



Datë: 13.06.2025

Numër Protokolli: 4020/2025

A.nr.805/2025

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosjen e Ankesave në përbërje nga: Arben Mehmeti-kryetar, Eshref Shabani dhe Ardita Haxhnikaj Demi-anëtarë, me Flakron Gashi- në cilësinë e procesmbajtësit ka shqyrtuar ankesën A.nr.805/2025, të datës 05.05.2025, të parashtruar nga ankuesi G.H, kundër Njoftimit të datës 18.04.2025 të Njesisë së Burimeve Njerëzore të Ministrisë së Financave, Punës dhe Transfereve, në çështjen juridike “*kontestim konkursi*”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.7 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, si dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 13.06.2025 mori:

V E N D I M

Hedhet poshtë si e palejuar ankesa A.nr.805/2025, e datës 05.05.2025 e parashtruar nga ankuesi G.H

A r s y e t i m

Kandidati për praninë në shërbimin civil, G.H(*në tekstin e mëtejme referuar: Ankuesi*), me datë 05.05.2025 përmes emailit zyrtar ankesa.kpmshck@rks-gov.net, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, e cila është regjistruar me datë 05.05.2025 dhe numër protokolli 2946/2025 nën shenjën A.nr.805/2025, kundër Njoftimit të datës 18.04.2025 të Njesisë së Burimeve Njerëzore të Ministrisë së Financave, Punës dhe Transfereve.

Këshilli i Pavarur Mbikëqyrës për Shërbimin Civil të Kosovës (*në tekstin e mëtejme referuar: Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datën 19.05.2025 ka proceduar kërkesën për përgjigje në ankesë tek Ministria e Financave, Punës dhe Transfereve, ndërsa kjo e fundit me datë 23.05..2025, ka dorëzuar përgjigjen në ankesë lidhur me procedurën në fjalë.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) për vendosje meritore administroi këto prova: Ankesën të datës 05.05.2025 të parashtruar nga ankuesi në KPMShck; Njoftimin e datës 18.04.2025 të Njesisë së Burimeve Njerëzore; Kopjen e konkursit; Kërkesë për përgjigje në ankesë e datës 19.05.2025; Përgjigje në kërkesë e datës 23.05.2025; Vendimin e datës 16.04.2025 të Sekretarit të Përgjithshëm; Aplikacionin e ankuesit të datës 09.03.2025 me dokumentacionin e bashkangjitur; Formulari i renditjes përfundimtare i datës 07.05.2025; Njoftimin për kandidatët e suksesshëm të datës 07.05.2025.

Kolegji i Këshillit , pas analizimit të shkresave të lëndës të parashtruara nga palët, ka konstatuar se ankesa e ankuesit në këtë fazë **është e palejuar, sepse:**

Kolegji i Këshillit nga administrimi i shkresave të lëndës ka konstatuar se Ministria e Financave, Punës dhe Transfereve, më datë 07.03.2025 ka shpallë konkursin me numër Reference RN00016973, për Grupi i arkiv- dokumentacionit, pozita e punës “Zyrtar për administrimin e dokumentacionit”, Zyra Lokale e Pensioneve në Pejë, Departamenti i Shërbimeve të përgjithshme në kuadër të MFPT-së, ku afati për aplikim ka qenë nga data 08.03.2025 deri më 06.04.2025, ndërsa nga shkresat e këndës arrihet në konstatimin se edhe ankuesi ka aplikuar në këtë konkurs.

Tutje, nga shkresat e lëndës rezulton se ankuesi, nuk e ka kaluar fazën e verifikimit paraprak, pasi që Njësia e Burimeve Njerëzore e Ministrisë së Financave, Punës dhe Transfereve, përmes Njoftimit të datës 18.04.2025 i ka refuzuar aplikacionin me arsyetimin se i njëjti nuk plotëson kriteret e përgjithshme të konkursit respektivisht, ndërlidhur me kualifikimin arsimor profesional: Diplomë e arsimit të lartë e nivelit të parë (bachelor). Tutje, akti kontestuar përmbante udhëzimin në mjete juridike apo këshillën juridike, si në vijim: “ Kandidati i pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK sipas afatit të përcaktuar në ligjin përkatës për procedurën administrative”

Ankuesi në ankesën e parashtruar në Këshill, pretendon se i është refuzuar aplikacioni në mënyrë të kundërligjshme për procedurën e rekrutimit sipas konkursit RN00016973 të datës 07.03.2025, pasi që i kam plotësuar kriteret e nevojshme, në përputhje kriteret e përcaktuara ligjore dhe se veprimi i organit të punësimit bie ndesh me nenin 7 të Rregullores (QRK) nr. 15/2023 për Procedurën e Pranimit në Shërbimin Civil.

Kolegji i Këshillit lidhur me këtë çështje juridike administrative, sa i përket procedurave të pranimit lidhur me pranueshmërinë e ankesës së ankueses mori për bazë dispozitat e nenit 27 Paragrafi 4 te Ligjit nr.08/L-197 për Zyrtarët Publik , i cili përcakton se: “4. E drejta e ankimit në KPMSHCK i njihet edhe çdo kandidateje/i në procedurë pranimi në shërbimin civil”, si rrjedhojë meqenëse ankuesja konteston procedurën e rekrutimit që ndërlidhet me fazën e verifikimit paraprak, atëherë Kolegji i Këshillit konstaton se mënyra e parashtrimit te ankesës lidhur me procedurat e pranimit në Shërbimin Civil është rregulluar me nenin 44 paragrafi 10 të Ligjit nr.08/L-197 për Zyrtarët Publik i cili përcakton se: “10. Kandidatët/ët e pakënaqur me procesin e rekrutimit, **pas shpalljes së rezultateve përfundimtare kanë të drejtë ankese në KPMSHCK sipas afatit të përcaktuar në ligjin përkatës për procedurën administrative.**”, dhe me nenin 17 Rregullore Nr. 15/2023 për Procedurën e Pranimit Në Shërbimin Civil, është përcaktuar se: “Kandidatët e pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK në afat prej tridhjetë (30) ditëve”.

Kolegji i Këshillit duke marre parasysh provat e lendes si dhe duke ju referuara dispozitave te cekura si më lartë konstaton se ankuesi ankesën e datës 05.05.2025 në Këshillin e Pavarur Mbikëqyrës për Shërbim Civil e ka parashtruar para shpalljes se rezultateve përfundimtare, gjegjësisht Kolegji konstaton se meqë procedura e ankimit ndaj procedurës se pranimit është parashikuar sipas dispozitave Ligjit Nr.08/L-197 për Zyrtarët Publik dhe Rregullores (QRK) nr. 15/2023 për Procedurën e Pranimit në Shërbimin Civil, atëherë ankesa e parashtruar para shpalljes se rezultateve përfundimtare është në kundërshtim me nenin 129 paragrafi 1 nën paragrafi 1.4 të Ligjit Nr.05/L-031 për Procedurën e Përgjithshme Administrative, ngase refuzimi i aplikacionit të ankuesit sipas Njoftimit të datës 18.04.2025 nuk nënkupton shpalljen e rezultateve përfundimtare në kuptim të nenit 17 të Rregullores Nr. 15/2023 për Procedurën e Pranimit në Shërbimin Civil, pasi që procedura e

rekrutimit në rastin e konkursit ndaj të cilit ankuesi ka parashtruar ankesë ende nuk kishte përfunduar në kuptim të nenit 44 paragrafi 10 të Ligjit nr.08/L-197 për Zyrtarët Publik, gjegjësisht ë të paktën deri me datë 07.05.2025 sipas përgjigjes së dhënë nga Njësia e Burimeve Njerëzore, si dhe konstatimit edhe në sistemin online të rekrutimit konkursi.org-gov.net.

Bazuar si me sipër si dhe duke ju referuar provave të lëndës Kolegji i Këshillit konstaton se ankesa e ankuesit e datës 05.05.2025 e parashtruar ne Këshillin e Pavarur Mbikëqyrës për Shërbim Civil, është e pa lejueshme në kuptim të nenit 129 paragrafi 1 nënparagrafi 1.4 të Ligjit nr.05/L-031 për Procedurën e Përgjithshme Administrative sepse e njëjta është parashtruar në fazat fillestare të procedurës së rekrutimit gjatë të cilave ligji material nuk e ka përcaktuar të drejtën e ankesës në KPMSHCK.

Vendim hyn në fuqi në ditën e nënshkrimit nga Kryetari i Kolegjit.

Këshillë juridike: Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij Vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda, A.nr.805/2025, datë 13/06/2025.

Flakron GASHI

Procesmbajtës

Arben MEHMETI

Kryetar i Kolegjit

Vendimi i dorëzohet:

- Ankuesit G. H;
- Ministrisë së Financave, Punës dhe Transfereve (Udhëheqëses së Burimeve Njerëzore), si dhe;
- Arkivit të KPMSHCK-së.